

# Instradà infurmaziuns d'urgenza

L'uffizi da chatscha e pestga porscha dapli infurmaziuns davart il sa cuntegnair dal luf

DAD ANDREAS CADONAU / ANR

■ **L'uffizi da chatscha e pestga ha instradà da cuminanza cun il Plantahof in sistem d'infurmaziun d'urgenza via sms davart las activitads dals animals da rapina en il chantun Grischun. Las novitads curtas sa drizzan a chaute-gias, elevaturs da biestga ed animals manidels inclus apiculturs. In dals emprims pass da l'uffizi per porscher dapli trasparenza.** Dacurt han ils responsabels da l'alpegiaziun grischuna, ils elevaturs da biestga ed animals manidels, apiculturs e represchentants dals parcs da la natira retschavì ina novitad sin il telefonin derivanta da l'Uffizi da chatscha e pestga dal chantun Grischun e dal Plantahof. In sms cun l'annunzia da partenza da l'info pertutgant ils animals da rapina. Il manader da l'uffizi da chatscha e pestga, *Adrian Arquint*, ha confermà che l'uffizi veglia augmentar las infurmaziuns en connex cun il sa cuntegnair dals animals da rapina en emprima lingua en connex cun ils lufs. Sch'els collavuraturs da l'uffizi remartgeschien activitads dad animals da rapina vers animals da niz veglia l'uffizi infurmar ils pertutgads. L'annunzia valia sco novitad d'urgenza ed ils possessurs dals animals sajan sezs responsabels davart las mesiras da protecciun ch'els veglian instradar u betg instradar. Sa chapescha ch'i saja bun sch'els possessurs dals animals possedian en quel cas in plan d'urgenza. Arquint ha confermà l'existenza da gruppas da chat en divers regiuns dal chantun che hajan barattà infurmaziuns davart scuvertas e sa cuntegnair dals animals da rapina. Ussa veglia

l'uffizi da chatscha e pestga augmentar il radius da quellas infurmaziuns sin l'entir intschess grischun e parter las infurmaziuns dals survegliaders da chatscha cun ils pertutgads.

## Passa duamilli adressats

Confermà las activitads d'infurmaziun en connex cun animals da rapina ha il manader da la cussegliaziun purila al Plantahof, *Bapist Spinatsch*. El ha expli-

tgà la collavuraziun dal Plantahof en connex cun las infurmaziuns via sms e menziunà circa 2300 adressats involvids. Las adressas respectiv numers dal telefonin haja il Plantahof retschavì da l'Uffizi d'agricultura chantunal sulet per diever d'infurmaziun davart ils animals da rapina, ha ditg Spinatsch. L'idea primara dad infurmar via whatsapp saja vegnida sbittada per mancanza da la protecciun da datas e la pussaivladad da parter fotogra-

fias sur la plattafurma pli vasta. L'intent da la nova purschida saja dad infurmar e na promover emozions. Demussa in luf ina speziala attaschadadad, per exempel vers nursas sisum la Cadi, na retschaiva betg l'entir chantun l'infurmaziun d'urgenza, mabain sulet las persunas en la regiun pertutgada. La collavuraziun dal Plantahof en connex cun ils sms d'urgenza è limitada per in onn, ha il manader da la cussegliaziun purila confermà. A par-

tir da l'onn proxim quinta l'uffizi da chatscha e pestga da pudair mantegnair la rait d'alarm en atgna reschia.

## Dapli trasparenza

Il sms d'urgenza n'è dentant betg la suletta novaziun pertutgant il cumportament dals animals da rapina en il chantun Grischun. Las infurmaziuns dals survegliaders da chatscha davart il sa cuntegnair da lufs ed urs preveda l'uffizi da chatscha e pestga da preschentar sin in'atgna pagina d'internet accessibla per in e scadin. In termin concret per la publicaziun da las infurmaziuns via internet n'ha Arquint betg pudì numnar. Las preparativas han cumenzà, dapi duas emnas ha l'uffizi incumbensà ina persuna responsabla per l'infurmaziun cun la publicaziun. Al timun da l'uffizi da chatscha e pestga è impurtant da communitgar che ses uffizi nun haja in motiv da tegnair enavos infurmaziuns davart il cumportament dals animals da rapina. Ins veglia porscher las enconuschientschas da l'uffizi uschè transparent sco pussaivel. Sche l'opiniun da la nuntrasparenza da l'uffizi da chatscha e pestga saja stada avant maun haja quai plitost da far cun mancanza da resursas da personal che cun la tenuta da l'uffizi. Arquint ha punctuà ch'il luf possa esser activ actualmain sur l'entir intschess dal chantun Grischun e na adina en enconuschientscha da la surveglianza da chatscha. Malgrà tuttas infurmaziuns e trasparenza n'èn surpraisas betg sclausas. Per quel motiv è Arquint led da retschaiver ulteriuras infurmaziuns da la publicità davart scuvertas cun ils animals da rapina sin via tras il Grischun.



Il luf grischun chatta la via en l'internet. L'uffizi da chatscha e pestga è londervi da publicitar las atgnas enconuschientschas davart il sa cuntegnair dals animals da rapina en la rait.

FOTO PRO NATURA